



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima



tir yimym

TAPAK 7

**Centre sorkari aluyimertem
ola nembangtsür**

**Russian opposition lenir Alexie
Navalny Arctic Prison nung süogo**



VOL. XXI ISSUE NO. 125 (ADOK 125) DIMAPUR

KÜPTOKNÜ (SATURDAY)

TSÜKLAİ (FEBRUARY) 17, 2024 ₹ 5.00

Nagaland sorkar mapa inyakertemi Old Pension Scheme meshia lungkak ait



Civil Secretariat Kohima nung Nagaland sorkar mapa inyakertemi Old Pension Scheme (OPS) tenzüksü takhangba agüja lungkak aitba angur.

Kohima, February 16, 2024 (TYO): Nagaland sorkar mapang inyakertemi Hokolbarnü National Strike nung denogo aser parnoki New Pension System (NPS) agiener Old Pension Scheme (OPS) tenzüksü takhangba agütsü.

2010 nungi Nagaland nung sorkar mapa inyakertem Civil Secretariat Kohima kima nung adenshi. Parnok ya Nagaland National Pension System Government Service Employees' Forum (NNPSGSEF) kübok aden.

"All India State Government Employees Federation (AISGEF)-i "Scrap NPS. Restore OPS" takhangba agüja National Strike ayongzükba pusema nungita onoki Nagaland nung timi lungkak aitogo" ta NNPSGSEF president Moanungsang-i ashi.

2010 küm state sorkari NPS tenzükba sülen sorkar mapa inyaker 33,000 tema iba nung dena lir, ta pai ashi.

"OPS aser NPS tsüngda tepila tulu lir aser September 2023 nung

NNPSGSEF-i state sorkar dangi shidi ka züluogo saka tanü tashi iba telangzüba kecha mali. January 1, 2010 sülen sorkar mapa nung shimokertemi sorkar tetuyuba ajanga NPS shimtsüsa aküm ta tanü National Strike ajanga jangjashitsür" ta Moanungsang-isa ashi.

"Iba ajanga sorkar mapa inyakertem taginüba matonger aser sorkari mapa nungi anisüngzük anguba sülen ang pension kecha magütsür" ta pai ashi.

NPS melena OPS aginür

kechiyong OPS ya government beneficiary ka lir aser sorkar mapa inyaker nem pension agüja parnok tarutsü anogotem asoshi social security ka agütsür, ta paisa ashi.

"NPS yabo stock exchange/ share market nung dang amendaka lir aser social security kecha magütsür. NPS ya corporate beneficiary ka lir aser sorkar mapa inyaker nem tajangzük kecha magütsür. NPS ya nija company ka lir aser state sorkari ita shia 50% aser mapa inyakeri 50% enoktsür" ta

NNPSGSEF president-isa metetdaksü.

"Nagaland nung Old Pension Scheme tanaben tenzüksüla aser iba ajanga mapa nungi sodi angur ajaki pension/family pension angutsü" ta paisa ashi.

Onoki tarutsü anogotem nunga maneni takhangba agütsü aser Nagaland sorkari tanga state tem nung ama OPS tenzükshitsü teimla lir, ta Moanungsang-isa ashi.

Tanü anogo ana lungkak aitba mapang Confederation of All Nagaland State Services Employees' Association (CANSSEA) aser Kohima, Dimapur, Niuland, Chumoukedima p Kiphire nungi NNPSGSEF units teshimtet nübortemi o jembii.

NNPSGSEF ya district pungu nung tenteta lir aser tanüngba district tem nunga tenzüksü mapa inyakdar, ta Moanungsang-isa ashi.

NIPF-i PM Modi dangi shidi zülu

Dimapur, February 16, 2024 (TYO): Centre sorkari Free Movement Regime (FMR) agientsüba aser India-Myanmar arrtsü atsüdagtsü magizüker ta Nagaland Indigenous People's Forum (NIPF)-i ashi.

Kanga dang ajungbena FMR agientsüba aser arrtsü Indo-Myanmar arrtsü atsüdagtsü lemtetba ya tejashitsü osang ka lir ta NIPF-i Prime Minister dangi shidi ka züluogo.

Iba lemtet ya arrtsü anatülen alirtem asoshi kanga majung lir. Iba tesem nung yimjung aser nübortem sünepa alitsü atema inyakba maparen nung iba lemtet ajanga tetsükdaksü bentsür arutsü ta parnokisa ashi.

Tesüiba nung onok dang masüngdangtepi arrtsü ladanga külem nübortem linük balala nung alitsüsa tia ka ajuru. Iba ajanga ozü nübortemi timtem kanga ajuruogo aser alemli nungi libaliroa aruba nung tetsükdaksü ajuru, ta NIPF-isa metetdaksü.

Lisopurtemi yimjung aser telongjem asoshi inyakba mapa nung aser arrtsülen terenlok bener arutsü atema tanga lenmangtem bushitepa inyaksü mepishir, ta parnokisa Prime Minister dangi shidi züluogo.

Hokolbarnü Dimapur nung India Myanmar arrtsü tebilemtsü atema symposium ka ayonga agidang NIPF-i northeast state pezü nungi Core Committee ka tentetogo.

Churachandpur DC aser SP nati district toktsür ao

Imphal, February 16, 2024 (Agencies): Manipur kübok Churachandpur district nung Deputy Commissioner (DC) aser Superintendent of Police (SP) nati district toktsür ogo. Brihostibarnü Churachandpur nung mepetmesü adoka raratepba sülen tenati district toktsür ao aser Assam Rifles-i law and order maparen ketdangsädar.

Indigenous Tribal Leaders' Forum (ITLF)-i Churachandpur SP aser DC dang ghonda 24 tsüngda district toktsür aotsü mapang züngzüksüba sülen Hokolbarnü tena ao.

"District nung mepetmesü adokbaji SP Sivanand Surve aser DC S Dharum Kumar na ajanga liasü aser idangji police-i nisung ana khaset anungji DC aser SP nati tashi mangara sorkar office ajak shibangtsü" ta ITLF-i metetdakja liasü.

Kuki head constable Siamlalpaul-i prangpong abenba Kuki nunger kar den tangokba noksa ka atema mapa nungi anentsüba anema nisung telok kati sepaitem den raratep. Iba lendong nung nisung 2 khaset aser 42 yirutsü.

Brihostibar aonung nisung 300-400 shi ka SP office nungpoka atu aser lung ona rara, iba jagi tenük amdaksüba mokozü amshitsüsa aküm ta Manipur police-i ashi.

Head constable Siamlalpaul mapa nungi anentsüba ya Kuki nunger dak tim masüba mapa inyakba sayur ta nisungtemi ashishitep.

Lendong-tsüdong nungi kümzükba alitsü aser tensa azüoktsü atema Hokolbar nungi tenzükba Churachandpur district nung anogo pungu atema internet services shibangogo.

Nagaland nung Coffee Roasting Machines lema agütsü

Kohima, February 16, 2024 (DIPR): February 16, 2024 nü Directorate of Land Resources nung Coffee Roasting Machines program agiogo.

North Eastern Council (NEC)-i teyari agüja inyakba mapa lapokba sentong nung Land Resources Advisor G. Ikuto Zhimomi aden.

"Nagaland nung coffee lu ayimba ya 1970s nungi tenzük aser tanü ano iba mapa asentenshia tenzük. 1990s tatemlen ka iba industry tejakleni moutettsüsa aküm saka 2014 küm Department of Land Resources-i tanaben tenzüksü" ta Advisor Ikuto-i ashi.

Iba ajanga North Eastern region nung coffee lu ayimba

tsütsü Nagaland ya jenjang temapur rongnung dena lir, ta pai ashi.

"Nagaland ya coffee kanga tsünütetba tesem ka akümtsü lenmang lir. Coffee lu ayimba yagi tekong lu ayimba melenzükttetsü aser Brazil, Vietnam, Colombia o Ethiopia ama coffee aika tsünütetba tesemtem ama akümtsü" ta Advisor-isa ashi.

"Commissioner Secretary Land Resources-i aluyimertem yariba atema tenüngsang agütsür aser department-i areca nut, coffee aser rubber lu ayimertem maneni yaritsü nangzük. Chief Minister Rio-i aluyimertem yaritsü nangzükba inyaker aser tarutsü anogotem tajung asütsü"

ta Ikuto Zhimomi-isa ashi.

Iba sentong nung Zakietsono Jamir - Dimapur; R. Lichanbemo Humtsoe - Kohima; Tiakum Kichu - Mokokchung; Nsungthung V. Ngullie - Kohima; Thejanuo Kets - Kohima; Boholi Chishi - Dimapur aser Kekhriengulie - Kohima nunger nem Coffee Roasting Machines agütsü.

Sentong nung Land Resources Director Albert Ngullie-i tesentepertem ajak pelaa agizük aser Nagaland nung coffee lu ayimba renloka aruba osang lemsatep.

"Coffee Board of India aser NEC külemi Nagaland nung coffee lu ayimertem yariba atema kanga pelar" ta Albert Ngullie-i metetdaksü.



Nagaland nung Ashok Leyland 3S Dealership Wb.L. Mongkum Jamiri bener arua Seithekema C, Chümoukedima nung February 16, 2024 nü nungi tenzükba Symbios Auto ta tenüng agütsür amenogo. Iba sentong nung tongti tejaoker Nagaland Roads & Bridges, Minister Wb. G.Kaito Aye liasü. Ashok Leyland company ya khu abenba aser nisung amenba gari tulu yanglur company tulutem rongnung tanabuba lir. Iba Symbios Auto nung ya Ashok Leyland garitem aser gari anishirtem aser yanglushirtem nungdak ajak amhang sangwa methitemi angutsü. Tanü iba Symbios Auto tenzükba sentong nung Ashok Leyland company purtemi Ashok Leyland dealer aser Symbios Auto nung Managing Director L.M.Jamir nem company nungo agütsüba noksa nung angur. (Seithekema, Feb.16, 2024.

NEP 2020 & NBA Accreditation indang sentong agiogo



Dimapur, Tsüklai/February 16 (TYO): Directorate of Technical Education, Nagaland ajanga Officers, Principals aser Faculties tem atema National Education Policy (NEP) 2020 & National Board of Accreditation (NBA) indang ananü Conference-cum-Workshop sentong February 8-9, 2024 anogotem Directorate of Technical Education indang Conference Hall, Kohima nung ayongzüka agia liasü.

Iba sentong nung National Institute of Technical Teachers Training & Research (NITTTR), Kolkata nungi

takotet nisungtemi shisalen sayua liasü.

Sentong nung Prof. Urmila Kar-i "NEP 2020 Policy and its Impact on Education System and Curriculum Model" indang onük nung jembi, koba All India Council for Technical Education (AICTE), Government of India, New Delhi ajanga yangluba lir.

Dr. Rayapati Subbarao-i AICTE approved Technical Institutes/Polytechnics ajanga nung NBA accreditation asütsü nungdakba indang jembidang AICTE, GoI, New Delhi nungi scheme balala agiteter aser Technical Institutes tajungba

kumdaktsür ta ashi.

Iba sentong nung Polytechnics indang principal temi PowerPoint presentation balala agüja liasü.

Er. Vipulhou Lhoungu, Director ajanga tajungshi o jembidang state nung Technical Education tali temaba jenjangi ajungkettsü asoshi dangar dang nungi tali inyaktsü ayongzü.

Tiakaba Amer, Additional Director ajanga pela agizükba o jembi aser Er. Khrietoulie Rupreo, Controller of Examination & Programme Coordinator ajanga melepzüng o jembia sentong tembang.

NDPP CWO ajanga tetsürtem atema seminar ayongzü

Kohima, Tsüklai/February 16 (TYO): Nationalist Democratic Progressive Party (NDPP) Central Women Organisation ajanga Kohima nung Hokulbarnü 'A perfect woman, makes the world beautiful' omen kübok tetsürtem atema health aser wellness seminar ka ayongzüka liasü.

Iba sentong nung jembidang taoba MLA Dr Neikiesalie Nicky Kire-i ashiba agi, aiben mezüngshi yujaka loktiliba nung tetsür anema alitsü ya kanga tongtipang lir.

Naga nungerbo loktiliba nunga süang mesüra kibong nunga süang, tetsür anema alitsü atema temulung agütsür, ta pai ashi.

Loktiliba indang ken o aser tebilemtsü kasa jenjang nung lemsateptsü asoshi tetsürtem nema kasa maongka

agütsüsüla, ta pai ashi.

Naga nungeri tetsür nem maongka shidak agüja Parliament nunga mena lir aser State Assembly nunga lir ta ashi.

Naga Hospital Kohima nunga January ita kisüng nung tetsür 5000 dak temai teyari balala agia liasü aser kasa mapang tebur 4000 shi liasü.

"Tetsürtemi mozüki nung service ajak agitetsüsa asenoki inyaktsüla," ta Dr Nicky Kire-i ashi.

Linük nunga dangalenbo tetsürtem nem reservation shilem 50 agütsür aser Nagaland nunga Urban Local Bodies atema tetsür atema reservation shilem 33 agizükogo, saka parnoki tajungba inyaktetsü asoshi teyari tali agütsüsüla, ta pai ashi.

Make-up artist Christy Tsanglao-i pei temang anepaluyim indang lemsatepba mapang make-up ya dangar dang sayutsü atema masü saka pei sasa pei dak tamang katettsü aser temulung ulushitsü atema nungdaker, ta ashi.

Spa massages ajanga anibelen aser temang ngoyangoshi nungi anisüngzü angur, ta lai ashi.

NDPP CWO secretary Achung N. Phom menden sür agiba sentong ya Kibubai sayuba sarasadem agia tenzük aser NDPP CWO tir Vikali A. Zhimomi-i pela agizükba o jembi aser NDPP working president B. Bendang Jamir-i melepzüng o jembia liasü.

Iba sentong nung Nito Sheqi Swu aser Nikato Tamang nati temeja ken ka tena lokti ayongzüka liasü.



Vitsutho Nyuthe, Managing Director, NHHDC Ltd., Dimapur ajanga February 16, 2024 nü Handloom Expo semzüksüdang tangokba noksa ka yangi angur. Iba sentong ya Nagaland Handloom & Handicrafts Development Corporation ajanga ayongzü aser Office of the Development Commissioner (Handlooms), Ministry of Textiles, New Delhi ajanga sponsor asür, koba February 29, 2024 tashi alitsü. Iba sentong nung Assam aser Nagaland nung district balala nungi kija aser telok 60 arua shilem agitagi.

KSC indang 1992-94 PU Batch Reunion sentong agi

Dimapur, Tsüklai/February 16 (TYO): Kohima Science College indang 1992-1994 Pre-University batch pur Reunion sentong February 10, 2024 nü Kohima Science College Auditorium nung agia liasü, kong India tesem balala aser bendang lima nungi züngsem 102 arua shilem agi.

Iba sentong nung menden ya Dr. Lanurenla, Principal, Sao Chang College liasü aser lai lar batchmates tem aser KSC principal, faculty, Alumni Association aser kaketshirtem pela agizüka liasü.

Oriental Theological Seminary nung Associate Professor, Rev. Dr. Ellen Konyak Jamir-i sentong nung Tsüngrem temoatsü jazüka sarasadem.

G. Rio School, Kohima indang Dean of Students' Affair, Kevin Savino-i anir "The Empty Chair" sentong agidang parnok külemi azünger nisung 20 alima nungi pilar aliba bilemteta parnok nem akum agüja liasü.

Kohima Science College kaketshirtemi anir teloki College Anthem aten aser parnok PU azüngba mapang bilemteta coffee table book ka Dr. Temjenwabang-i sayatsü aser 1992-94 batch pur küm 30 sülen tanaben ajurutepba asoshi tenüngsang agüja liasü.

KSC Alumni Association aser students body ajanga salem o jembiba den Atoho K Kiho-i ken tajung ka aten.

Sentong nung UK nungi Software Engineer, Er. Ravi Singh-i par batchmates tem tenüng nung "Down Memory Lane" bilemteta parnok college azüngba mapang ajangshibatem lemsatepa liasü.

Ethungbemo Ezung ajanga melepzüng o jembi aser teloki Reunion Anthem atenba sülen Keviyieno Zhasa ajanga sentong tembanga sarasadema liasü.

Maneni parnoki business hour aser nikongdang sentong ya Highland Park nung agia liasü.

MLA Imti Chuba Chang-i Chang kin lungjema alitsü ayongzü



Dimapur, Tsüklai/February 16 (TYO): Noksen yim dak February 16, 2024 nü 79 buba Chang Khulei Setshang sentong aliba nung mejetteta semdang ka ama MLA Imti Chuba Chang dena liasü.

Iba sentong nung pai jembidang terenlok asoshi Chang nungertem lungjemtsü ayongzüka liasü.

Pei nükjidong atongtsü asoshi elected members asem den yariteptsüla aser tarutsü jenjang tajungba kumdaktsütsü mechi technology terenlok den asen tangatetba lirumedema alitsüla ta ashi.

Kidanger den yimjung nung

aliba aser putepa litetba atema Deputy Commissioner, Tuensang, Lithrongla Tongpi Rutsa-ia Chang kin nem tenüngsang agüja liasü.

Lai lenirtem dang sobaliba tajung wazüka ayutsü ajungshia liasü.

CWS tir Pongsu-i temang anema aliba, education aser district nung terenlok mapa balala indang jembi aser nüburtem dang amalitep akatsü ayongzüka liasü.

Iba sentong nung CKS tir Nungsanglemba Chang-i pela agizükba o jembi aser Yali Youth ajanga saya tajung ka agi shilem agia liasü.

Kohima nung taxi scooty kati nisung ka tsükset

Kohima, Tsüklai/February 16 (TYO): Hokulbarnü Kohima nung taxi scooty kati tetsür ka dak atsükba sülen la yangi asü.

Osang ajanga ashiba agi tetsürla ya lenmang ajanga aoba mapang scooty ya kanga kera arua la dak atsük.

La ya Oking Hospital-i arrsanga bener ao saka la süogo ta sangdonga liasü. La ya arishi küm 59 tain Krishna Biswakarma aser Paramedical Colony nung alir ka liasü.

Scooty anisang ya maneni bushisüngdangtsü atema police ket nung yua lir.

Karnataka nung Congress-i Khristantem nem sen cr. 200 lezmüksü



February 16, 2024 nü Bengaluru nung Karnataka Chief Minister, Siddaramaiah-i yangkhu ka nung budget papers bener state assembly-i aodang tangokba noksa nung angur.

Bengaluru, Tsüklai/February 16 (Agencies): Karnataka nung Congress sorkari budget nung waqf kiojen wazüka ayutsü, Mangaluru nung Haj ka Bhavan asütsü aser state nung Khristantem terenlok atema sen crore 330 lezmüksüogo. Chief Minister Siddaramaiah-i aniba state sorkari Waqf kiojen wazüka ayutsü atema sen crore 100 aser Khristantem terenlok atema sen crore 200 lezmüksü. Ajsüaka assembly nung opposition BJP-ibo iba

telemtetbaji junga magizük. BJP lenir, Amit Rakkshsh-i, "Congress-i aniba Karnataka state sorkari nung waqf kiojen wazüka ayutsü, Mangaluru nung Haj ka Bhavan asütsü aser state nung Khristantem terenlok atema budget nung sen crore 330 lezmüksüogo. Sorkar kübok tekülem kitem nung Hindu nung tamangertemi tenla agütsüba nungi küm shia state sorkar nem sen crore 450 agütsür saka Hindu tekülem kitem state kübok masütsü atema ozüngtembo Congress-i anemer," ta ashi.

Waqf kiojentem dak sendakba nung CM, Siddaramaiah-i, Archaeological Survey of India (ASI)-i wazüka ayuba kiojentem ajak kümzüka ayutsü, ta ashi. Congress sorkari Mangaluru Haj Bhavan asütsü atema sen crore 10 lezmüksü aser state nung Maulana Azad school 100 amenoktsü ta metetdaksü. Siddaramaiah-isa, Buddhist nung temeshi kakettem Kannada oshi nung meyiptsütsü aser iba maparen inyaksü atema senotsü lezmüksütsü, ta metetdaksü.

Centre sorkari aluyimertem ola nembangtsür: Sarwan Singh Pandher

New Delhi, February 16 (Agencies): Tang India kübok state balala nungi aluyimertem Delhi arrtsülen adenshir takhangba balala agüja longkak aitba mapang nung aluyimer unions nungi lenirtemi, Centre sorkari aluyimertem ola nembangtsütsü meranger, ta aitsü. Hokolbarnü aluyimertem lenir, Sarwan Singh Pandher-i, Centre sorkari aluyimertem ola nembangtsütsü meranger; sorkari aluyimertem indang social media accounts shibangtsüba den külemi aluyimertem longkak aitba video tangoka lemsateper YouTubers indang accounts shibangtsür, ta metetdaksü.

Punjab aser Haryana arrtsülen Shambhu aser Khanauri points nung anogo pezünübuba mongdar. Aluyimertemi longkak aita Delhi telungi aitsü merang, ajsüaka Delhi police-i tear gas amshia parnok nokdanga liasü. Sarwan Singh Pandher-i, police den raradang aluyimer 70 shibo kanga mejungi yiruogo, ta ashi. Singh-i, Brihostibarnü union minister tem den senden amenba mapang nung pai item tebilemstü onüktem lemsatepogo aser kuli atema tear gas shells-a sayuogo, ta ashi.

Singh-i, aluyimertem 'Delhi Chalo' sentong maneni agidar aser ken o jembiba ajanga telemtetba agitettsü imlar, ta metetdaksü. Aluyimertemi Centre sorkar dang Swaminathan Commission-i benokba ama MSP atema ozüng ka yangluang, ta akhangba den külemi taoba mapang Centre sorkari benokba ozüng tasen asem anema longkak aidang aluyimertem anema benoka aliba ken o ajak agentsü, arrshi küm 60 ser temapur aluyimertem aser alu nung aayangertem nem pension scheme, Lakhimpur Kheri district nung aluyimertem menüngsetba tatalokba nung aibelenertem nem temerenshi agütsütsü, Electricity Amendment Bill 2020 agentsü aser Land Acquisition Act of 2013 ozüng tanaben benoktsü akhanger.

Paisa, aluyimertemi minimum support price (MSP) atema ozüng ka agizüktsü densema pei temeden balala takhangba agütsütsü atema Delhi tsütsüleni aodang sorkari aluyimertem anema tashiyim amshio, ta aitsü. Longkak aiter aluyimertem

Paisa, union minister tem den senden amendang aluyimertem takhangba onük balala süoka o lemtepogo, ta metetdaksü. Minister tem aser aluyimer lenirtem senden amenyonga telemtetba kecha magitet aser maneni February 18 nüa senden amentsü ptelek anapronglai bangjemogo.

Aluyimertemisa MGNREGA scheme kübok küm shia aayangba anogo 200 asütsü, anogo ka taaji sen 700 asütsü aser 2021 küm longkak aidang asüba aluyimer kibongtem nem senotsü teyari agüjang ta akhanger.

Congress yimsüsüba kübok India tejakleni mao: PM Modi

New Delhi, Tsüklai/February 16 (Agencies): Congress party maneni aija Ato kilonser, Narendra Modi-i, Congress ochimashi yimsüsüba kübok linük tejakleni mao, ajsüaka tangbo India tejakleni molung lemteta odar, ta metetdaksü. Taküm April-May ita nung Lok Sabha elections agitsü lia Hokolbarnü Narendra Modi-i, "Congress ya ochimashi; parnoki tarutsü atema bilemstü makoker; Congress yimsüsüba kübok India tejakleni mao," ta metetdaksü.

Parnoki Modi anema ibaji jembir, koba ajanga loktiliba nung telemsa adokdaksür. Tanübo ajaki Congress toktsür aser iba party nung kibong ka dang anünger," ta pai ashi. Paisa Rajasthan-i France Tir, Emmanuel Macron pelaa agizükba atema pelaba lemsatep. Taküm Republic Day nung tongti tejaokerji Macron liasü. Taoba mapang Rajasthan nung Congress sorkar aija Modi-i, "Taoba mapang Rajasthan sorkar kübok tatidang paper prokshi aser ibaji ajanga lanurtem melung ajema aküm. BJP-i sorkar akümba sülen ibaji bushisingdangtsü atema Special Investigation Team ka tentetogo," ta ashi.

Video conferencing ajanga 'Viksit Bharat Viksit Rajasthan' programme nung jembidang Modi-i, "Linük nüchiso anguba sülen tanübo asenok hon putu nung lir. Küm ter tejaklen tebilemstü ajak paidoktetsüsa India-i iba maongka angu," ta ashi. "Tangbo India melung lemteta tejakleni odar. 2014 küm matongdangbo ochimashi aser bomb lendong indang ang o lemtepa liasü. India nung nüburtemi parnok koma asütsü aser linük koma asütsü, ta bilema liasü. Congress yimsüsüba mapang nung iba ama tensaji liasü," ta pai ashi. "Congress indang onük ka dang lir aser ibaji Modi anemtsü.

Hokolbarnü iba sentong nung Modi-i sen crore 17,000 jenjang terenlok project aika semzüktsüba den külemi project tasen atema foundation lung azüngtsüogo. 'Viksit Bharat Viksit Rajasthan' programme ya district ajak nung tesem 200 nung ayongzüka agi aser tongti sentongji state yimtiba, Jaipur nung agi. Kasa sentong nung state Chief Minister den minister tem, MP tem, MLA tem aser lokti balala nungi lenirtem aika aden.



February 16, 2024 nü Bihar kübok Sasaram district nung RJD lenir aser taoba mapang Deputy Chief Minister, Tejaswi Yadav-i aniba gari ka nung Congress lenir Rahul Gandhi-i 'Bharat Jodo Nyay Yatra' agidang tangokba noksa nung angur.



February 16, 2024 nü Patiala district anasa Punjab-Haryana Shambhu arrtsü anüker sepaitem matsüngdang aluyimertemi longkak aita yimyim ayimdang tangokba noksa nung angur. Hokolbarnü Samyukta Kisan Morcha (SKM) densema aluyimertem union aikati linük tesem ajaklen Gramin Bharat Bandh ayongzüka agiogo.

<p>बैंक ऑफ बड़ोदा Bank of Baroda</p>	<p>KOHIMA BRANCH Razhu Point, Main Road, Kohima, Nagaland- 797001 E-mail: vjkohi@bankofbaroda.co.in</p>
<p>KIOJEN AGIBA NOTICE</p>	
<p>Securitisation & Reconstruction of Financial Assets and Enforcement of Security Interest (Second) Act, 2002 aser Security Interest (Enforcement) Rules 2002 kübok Section 13(12) aser Security Interest (Enforcement) Rules, 2002 nung Rule 3 nung agüja aliba tashi nung ajemdaker tsünglanglen sign süa aliba Bank of Baroda nung Authorised Officer-i 30.11.2023 anogo nung Demand Notice ka ajanga sen apur M/S. THEJANGUZO LINYU dang notice agütsüba anogo nungi tenzüka anogo 60 tsüngda notice nung shia aliba ama Rs. 62,26,225.37 (Rupees Sixty Two Lac Twenty Six Thousand Two Hundred Twenty Five Paise Thirty Seven only) agüjang, ta tuyua liasü. Ajsüaka sen apuri seni magütsütet nung sen apur aser nüburtem dang tsünglanglen sign süa aliri iba Act nung Section 13 kübok Sub section (4) aser Security Interest (Enforcement) Rules, 2002 kübok Rule 8 nung agüja aliba tashi amshia 2024 küm February 16 anogo nung tsünglanglen shia aliba kiojen agiadokogo, ta sangdonger. Talisa sen apur aser nüburtem dang iba kiojen dak sendakba nung kecha inyaksangshi masütsü metetdaksür aser kari danga tetuyuba anema inyakra Bank of Baroda-i Rs. 62,26,225.37 (Rupees Sixty Two Lac Twenty Six Thousand Two Hundred Twenty Five Paise Thirty Seven only) den tetemlok meshitsü. Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüktsü atema inyaksü metetdaksür.</p>	
<p>Kiojen osang tejangja:</p>	
<p>L Khel, Kohima Village, High School Road, NH-61, Kohima, Nagaland- 797001 nung aliba Patta No. 8908(P), Plot No. 5879, area 1658 Sqft nung kimong nung aliba ajak aser building. Bounded By: North tsütsülen: Tophani, South tsütsülen: Kesielieithie Miachie, East tsütsülen: Thoselie-o, West tsütsülen: NH-61 lir.</p>	
<p>Date: 16.02.2024 Place: Kohima</p>	<p>Authorised Officer Bank of Baroda</p>



TIR YIMYIM YIMOBILEM (EDITORIAL)

DIMAPUR

KÜPTOKNÜ

TSÜKLAI 17, 2024

Tayoker danga asütsüla

Nagaland nung Mokochung nung dang masü saka yimti tuluba Dimapur aser Chümoukedima len asen nisungtem kari dokan tulu, Shopping mall lapoker, kari gari ayokba dokan lapoker, kari osettsüset aser chiyongtsü tapu balala yanglua ayoker ta inyaka pei asoshi dang masü saka loktia dena anisüngzükdaktsütsüsa inyaka anguba ya asenok tejakleni aoba tamaitü ka asütsü. Asenok ano shisa main aser tashitemeteta tuluka mali, anungji asenoki alima nung makaba ka bushiteta nisungtem nungdak nung amshitsüsa tang tangbo meyanglutettsüa akok. Ibaji dang masü, asenoki nisungtem asoshi nungdakba osettem teyanglua meyanglutettsüa akok mesüra tezüsena mezüsentedtsüa akok, saka asenok ajaki inyaktettsüba mapa ka lir, iba mapaji tangari renemtsüa akabatem ayoktsüba mapatem lir. Anungji, asenoki tanga kecha meinyaktetaka tangari renema akaba aser yutsübatem rongnung ka mesüra kabosa ayok ashitsüla. Iba jagi dang asenoka asen nungdakbosa alitettsü. Tanübo asenok aikati teyanglua kecha meyanglur aser tayoka kecha mayoker, iba jagi pei taküm nungdak alitsü makok, kar meshimetsür, kar rakzükratemer aser karibo pei temang ayoker kuma aoba asenoki angur. Aji tesasatsüka aser temeimtsüka lir. Alima nung meimchirtem ajak alima nung mazüngi aliba ya mapa lemsar inyakba ajanga lir. Kari nisungtem nungdak bilemdanga bushir, kari züsentedter mesüra yanglutetter aser itemji kari ayoker aser kari alir aser ano karibo yanglushitsür. Item mapa shia nungji tagitsü aser temoatsü keta lir. Iba jagi taküm alir, kibong mesür, lokti yarir aser yimten aser arogo tenzüker. Item mapatem rongnung ka mesüra ka inyaka asenok taküm mazüngi alibajiang, shitakba, asen sobaliba lir. Ajisüaka, asenok aikati alima nung ya nisungtem nungdak repringteta bushia agütsütsü asoshi khuretsa tebilema mebilemer, tezüsena kecha mezüsentedter, teyanglua kecha meyanglur, tayoka mayoker saka tali dang alir mesüra temeshi dang meshir ta lira, itemjibo alima nung tali meshizük, timtema melii karaa meyipa ao-ang tajungba asütsü. Atangji, alima nung meinyaknertem asoshibo mapa temela mali, mapa ajakji tasak, tezüdangtsüka aser tetsübuttsüka asütsü. Ibayongji, tasümait aser azümasenertemi 'tzüim külenji moijing tesashi lir,' ta jembir ta akhi shin o ka lir. Tangari pei taküm agi tendanga asenok nungdak tapu aika bushiteta yanglua toktsür külena asenoki itemji yoka amentsübaji tejangraa mejangrar aser tarema maremer. Iba jagi asen lima nung asenok rongnung kar dak alaka abensüoshi, chiyongtsü aser osettsüset ayoker ajak tangar bendangertem lir. Itemji kodang bilemdangdir, asenok süoshi tajung agir, gari nung dang senzüa chiyonga jema taküm aliba ya tesümgangtsüka, koba sen agi asenok nungdak peridakja taküm alir ta bilemdangtsüla. Atangji, dokan ka lapoker yangji nübortem nungdakbatem yoka anogo shia kechalenia moi amentsübaji asenok asoshi mapati asütsü. Asenok yabo pei taküm aser kibong nungdakba dangbo lokti, arogo aser yimten nungdak nung teimba jajar. Aji oda, dokan lapoka yur lokti nung shilem magitettsü aser arogo nunga metenzükettsü, kechiyong dokan shibanga yutsür lokti sendeni aotsübaji takoksa tulu asütsü. Kasaji, dokan shibanga yutsür arogo nunger deacon aser mapangser sendeni aotsübajia timtem tulu asütsü. Ano, talisa town arogotem nungbo bodbar aser honibar aonung sentepbo aonung masü nikongdang, office nung inyaker tema office nungi ki matongdang, tsüraburtem asoshia tanurtem school senshia ki tonga marudang aritepa agir mamangdang senshitsu meranger. Iba ama shishilembatsü nikongdang mapang tajung nung dokan shibanga toktsür sentepi aotsübaji, ashiko, Tsüngremia memulungtsüa akok. Item ajakji asenok ajaki asadanga, asenoksasa asen taküm aser kibong nungdak perir külenang lokti, arogo aser yimten nungdak peridaktsütettsüsa langkabosa inyaka alitsü asoshi bilemdangtsüla aser tanga mapa inyaktsü mapitetra, tangari renema yanglua toktsübatem ayoker danga asütsüla.

OLEMSABANG

Sarasadem tesep koma asü nung tajungba süla

Rev. Dr. Limatula Lkr.

(Yashi adok nungi...)

Prayer Centre aser Arogo

Arogo aser prayer centre tesendaktep kechi lir? Sarasadem tesep yagi arogo inyakyim nung jangjonger asü? Arogo aser Sarasadem Tesep tesendaktep nung timtem kar adoka ali asü? Mesüra arogo dang nungi parnoki ministry tajungba bener aor asü? Arogo asoshi sarasadem tesep ya teyarir tajung ka amai, arogo teinyaktsü aika parnoki inyakadoker asünungji arogo mapa pongpa kümdaktsür asü? Amanger tang tashi nungbo kecha telemsatep, tejashitep aser tashishitep malitsü südi. Saka kechiba külem arogo züngsemi arogo toktsür yamai fellowship tenzüka aor ta aiben bilemer. Arogotemi tenzüka wadang ken süoki ia bilemdangtsü mapang tonga aitogo. Ao lima nung arogotem kanga dang institutionalized süadoker, secular office ama dang kuma odaki. Arogo ya kechi atema alir? Tsüngrem tenzüka tetezü ken lepa repringshitsü mapang tongogo. Nüburtem asoshi tanela chiyongtsü prayer centre nungjiang angur asü?

Sarasadem Tesep Den Sentakba Nung Temelenshitsu Kar

Yangi sarasadem tesep nung temelenshitsu ta asüdang, iba nung ya sarasadem tesep aser arogo anaprongla nung inyakyim melenshitsu nungdaker ta ajiteter. Anungji yangi yamai asü nung jungdisü ta kü tebilemba kar lemsateper.

Prayer Centre Arogo kübok aita achaayangtsüla: Prayer Centre ya local arogo kübok yutet nungbo tajungtiba asütsü amai bilemer. Iba ya arogo nung ministry tongtibang ka kuma nüburtem tanela nung tsüratemdaktsü nungbo tajungtiba asütsü. Shitakba agi prayer centre-i inyakya aliba ya arogoi inyaktsüba mapa lir ta angatetdi. Mesüra Mungdang küboki anioka, guidance teperi agüja anebalu nunga ajungtsü asü ta bilemer. Arogo aika nung prayer mountain, prayer room, ta nüburtem sarasademtsü lapoka yuja lir. Yamalaji mesüka arogoi sarasademtsü jaka lapoktsütsüla. Iba jagi jentipur ajangzükettsü aser tanela ain akettertema pei sempet amshitsu leman sadema angur. Yamai pei pei jurila fellowship tenzüka modaktsüi, arogoi tanela sempet akartem, aser sarasadem nung tejangrartem ya telong junga anitener amshitsüla. Parnok nem guidance peria agütsütsüla. Ashiko sarasadem tesep lapoka aoba ya arogo nung sadema shilem magitetba ajanga asütsü akok.

Pastoral ministry nung asentenshi nungdaker: Prayer centre tenzüka aoba ya arogo nung pastoral ministry nung tashi mait akümba temaitü ka asütsü akok. Arogo ya nüburtem asoshi alir ta metetdi. Nüburtem tanela aser shi nung ajungmesotsü, ajungshitsu, metongshitsu, anepalutsü aser achaayangtsü, aser Tsüngrem O nung tera yanga anitettsü asoshi alir. Mungdang aser local arogo anaprongla nung nüburtem, talisa maka maitertem, anebalutsüba ya tera senzüka aor amai nibo ajiteter. Tenzüker kwikati pei santem timtem tia meteta lir? Asenok arogo nung toklang tenzükertem küm tepiyong program achaayangba nung mapang teimba ka indoker. Ministry ya kanga mejungi institutionalized süadokogo. Hau, arogoi Institution ka lir, saka ibaji rigid institution kuma ora nübur taginebaji mabensatettsütsü akok. Arogo nung temzüngji tiptema aotsü asoshi nungdak, saka ozüng nungji onsara ora ministry nung aiben tetsükdak adoker. A. P. Nirmal, India nung theologian nungtoko kati India nung pastoral ministry indang yamai shia lir "pastors are functioning like pujaris, caretakers and chowkidars of the mission compound and church traditions and neglect the essence of pastoral ministry". Ochi shia dang ashir pastor aika kiboksem nung tashi mait, aser ibaji nüburtemi teti mepelai jembir. Pastor dangi sarasademjang ta arutsübaji aiben arendaka bilemer kechiaser parnokji kanga dang mazüngi aliba nisungtem lir, saka prayer centre-ibo mapang mashi ka nung otetet. Asenoki metetdi, pastoral ministry ya 24 hours a day and 7 days a week. Tetezü, tenzüker kaji nübur asoshi teti azünga aliba, yarinüa aliba nübu ka asütsüla. Tanü tensa den putepa, nüburi agineba ama ministry issue based nung yanglushitsüla.

Tanü Mungdang staff-tema akhi ama arogo sema jajaba ajema kümogo, arogotemi aobaji teimba ka local arogoi sentong nung ajadang aoba lir. Yamai dang aonungbo Mungdang nung tenzükeri local arogo tia memeteti akümstsü akok. Mungdang nung tenzükertema nüburi aginetsüsa aser shisatsü agütsütettsüsa alitsüla. Iba denji Mungdang nung tenyaba mapa nung putu den apet inyaktsü asentenshi kanga nungdaka kümogo.

Sarasadem teloki arogoi inyakba mapa duplicate masütsüla. Tajungtibaji arogo kübok sarasadem tesep alitsüla. Saka yamai dang independent süa aotsü asünungbo aser sarasademtsü asoshi lapokba süra iba sarasadem nungji nendak nendaka sarasadem tesep-temi inyaktsüla. Arogo aser Mungdangi inyakba mapa kasaji meinyaktsüla. Angashiba agi centre aika nung Bible study, tekülem sentep aser training agütsür ta angazüker. Pei teinyaktsü arrtsü meteta inyaktsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nagaland Baptist Church Council-i Feb 24. nü sarasadem ayonger

Kohima, February 16 (TYO): Nagaland Baptist Church Council (NBCC)-i February 24 (Honibarnü) anepdang 6:00 ako nungi tenzüka nikongdang 6:00 ako tashi ghonda 12 sarasadem sentong agitsü ayongzüker; Khristantem tsüingda telongjem alitsü atema iba sarasadem sentong ayonger, ta NBCC General Secretary, Rev. Dr. Zelhoh Keyho-i sangdong ka ajanga metetdaksü.

"Asenok tsüingda sendaktepba mapang nung asenoki sarasadem nung Tsüingrem den sendaktepdi aser asen temepishibatem Pa nem metetdaksüdi. Kanga telemsa adokba tensa mapang ka nung asenok alir, kong loktiliba ajak nung telemsa adoker, medemer aser kibong züingsemtem tsüingda-a telemsa adokdar. Longjemer sarasademba ajanga Arogotemi Tsüingrem ajangshitsü kanga nüngdaka kümogo," ta sangdong nung shia lir.

"Iba anogo nungji Arogotem aser züingsemtemi Tsüingrem matsüingdang alemalua asen nübürtem atema Pa jak bushidi. Iba anogo nungji asenoki Tsüingrem taochi, Pa leniba aser asen nübürtem dang Pai aremzüka atema Pa nem tenüingsang agütsüdi. Iba mapangji taitok meshiba aser asen Kibuba Tsüingrem tenzüksü atema nangzüksüshiba mapang ka südaksüdi. State tesem ajaklen tamangertem

den külemi longjemer Tsüingrem dang taochi meshiba aser Pa leniba meshiba nung asenok ajaki shilem agidi," ta kanga sangdong ajanga ayongzüker.

Sarasadem onüktem:

1. Khrista temang nung züingsemtem aser Arogo lenirtem longjemtsü atema sarasademdi.
2. Sorkar nung tekolak, lenirtem aser mapatongtem atema sarasademtsüdi, koba ajanga yimjung bener arutsü aser nübürtem tip-atemtsü.
3. State nung yimtenren party ajak longjemtsü atema sarasademdi.
4. Ketdangsertemi mapatong ajak ochishia benoktsü aser nübürtem atema inyaksü asoshi asenoki sarasademtsüdi.
5. Naga yimtenren onük aser lenirtem atema sarasademdi.
6. Lenirtem aser yimjung atema inyaktermi ochishia inyaksü, nendaka inyaksü aser maparen ajak teladak süa inyaksü atema sarasademdi.
7. Tribal Hohos, lokti tentet balala aser kaketshirtem organization balala nung lenirtem atema sarasademtsüdi.
8. Tang Board tatidang tagütsüdak aser tatidang balala agütsür asen chirnurtem atema sarasademtsüdi.

9. Missionary tem atema sarasademtsüdi.
 10. Reshikangshi ajangshiba Arogo aser loktiliba nung sendokba Khristan minority atema sarasademtsüdi.
 11. School tanurtem aser sensak tia ajanga school-i mouteter tanurtem atema sarasademtsüdi.
 12. Tanurtem dang nendaka sayutsü atema tesayurtem asoshi sarasademtsüdi.
 13. Lanurtemi pei taküm tetezü keta litettsü atema sarasademtsüdi.
 14. Alu nung metsüh prokba mapang atonger, anungji aluyimertem atema sarasademtsüdi.
 15. Alima nung yimjung atema sarasademdi aser raraba tesem balala nung timtemertem atema sarasademtsüdi.
 16. Tamangertem tanela nung asentenshi atema sarasademdi.
- "Kü tenüng nung jatetba Kü nübürtemi ajemalur sarasadema Kü jak bushira aser temenen mapatem nungi meyipra Ni kodak nungi angashitsü, aser parnok menen atoktsü aser par lima aneptsütsü." (2 Putipuyang 7:14)

"Iba anogo nung ghonda 12 tsüingda asenoki Arogo, sorkar, asen lima, asen lenirtem aser asen nübürtem atema sarasademdi," ta NBCC General Secretary, Rev. Dr. Zelhoh Keyho-isa lepshia mepishia metetdaksü.

ANOGO ABEN TSÜNGREM DEN

Temeneni asenok nokdanger

Anungji mepet tulu ama kuli aika agi asenok meketbang nung asenoki tenokdangtsü ajak aser sotaka aliba temenen toktsür. Ibri 12"1

Asenok tsükchir tamajungtibaji temenen lir. Temeneni Tsüingremi asenok asoshi yangluba tajung ajak raksatsütsü meranger. Pauli temenen taaji tasüba ta ashi (Rom 7:11). Ibai kanga tekülak. Asenoki bilema maliba mapang ka nung temenen asenok dangi aiter. Iba yagi asenoki aginütsü süa tepuatsü keta sayur (2 Kor. 11:14-5).

Temeneni kanga kümdanga meilung meilungi asenok meketbanger. Asenok temenen sang nung pua ali tashi asenoki alizüing tonga kodanga masemtettsü. Temeneni kechi asenoki angateta ali nung dang asenoki iba nungi jenbua alitsü. Asenoki temeneni aibelen ka, yimya tamajung ka mesüra tashi mait ka dang ta bilemra, asenoki iba tesoetba nungi kodanga mepilatettsü. Asenok menen asenoki tangar dak kodanga matongtsüla. Asükümi ajemalurtemji shi nemja jembitsür. Iba küboki asenoki kodanga maitsüla. Temeneni asenok tenük tapok kümdaksür. Temeneni kodanga ozüing magütsür, iba yagi tekülak agi asenok tanelaren tashi ajak zükladaksür aser takok tashi ajak asenoki nungi agiadoker. Asenok asoshi osangtajungji Tsüingrem taochi temenen talenba ajak atendanga aor. Tsüingrem taochi agütsüba nüji temeneni noktangtsü makok. (Rom 5:20).

Temeneni ne taochi rakzüka lir asü? Iba yagi na tajungtiba kinüingtsü, tajungtiba jabaso, tajungtiba jala, tajungtiba mesüra tembar tajungtiba akümtsüba nungi sotter asü? Iba yagi na tanelaren tashi akümtsüba nungi sotter asü? Na temeneni noktangya lira, Tsüingremi tangsa salatsütsü. Tsüingrem taochi ajak dang kasa inyaker.

Yaküm Nigeria nung kiralongrartemi Khristan 8,222 tepsetogo

Yaounde (Cameroon), February 16 (Agencies): Nigeria nung Khristantem teimtiba tepsetbaji 2023 küm liasü; yaküm Nigeria nung Islamic telok balalai amakdang Khristan 8,000 dak tema tepsetogo, ta International Society for Civil Liberties and Rule of Law (Intersociety)-i metetdaksü.

Bodhbarnü sangdongba report nungji Nigeria tesem aika nung Khristantem tepsetba, puer aoba aser samaba osang tejangja metetdakja lir.

Intersociety Tir, Emeka Umeaglalasi densema lenirtemi sign süa aliba report nungji yamai shia lir, "2023 küm linük nung Khristan 8,000 dak tema tepsetbaji sorkari kümzüka Islamic Jihadists aser Nigeria Security Forces (NSFc) ajanga lir. 2023 küm January ita nungi 2024 küm January ita tashi nung- ita 14 tsüingda Khristan 8,222 tepsetogo."

Jihadist Fulani teloki Khristan 5,100 shi tepset, Boko Haram aser parnok den sendaktepa aliba teloktemi Khristan 500 shi tepset, Jihadist Fulani auertemi Khristan 1,600 shi tepset aser Islamic pusemer security sepaitemi Khristan

1,000 shi tepset. "January 2023 nungi January 2024 tsüingda Khristantem tepsetba ya tesüiba küm aika tsüingda teimtiba tepsetba lir. Iba

ya ajanga Nigeria sorkar aser security sepaitem tamakok sayur," ta kasa report ajanga metetdaksü. **(Maneni tapak 8 nung...)**

ABAM Arogotem nung Sannüker aser kinüingtsü/kinüingburtem sentong agi



February 14-16, 2024 anogotem nung Impur nung ABAM Lim Arogotem nung Sannüker aser Kinüingtsür/Kinüingburtem sentong agiba sülen tangokba noksa nung angur.

Impur, Tsüklai/February 16 (TYO): ABAM Church & Mission Ministry ajanga ayongzükaa ABAM Lim Arogotem nung Sannüker aser Kinüingtsür/Kinüingburtem sentong February 14-16, 2024 anogotem nung Impur nung kanga temoatsü ngua agiogo, ta ABAM Executive Secretary, Rev. Dr. Mar Pongener-i sangdong ka nung metetdaksü.

Ajak agi Arogo 68 aser agiogo. Tongti O jembirtem; Rev. Dr. Mar Pongener Executive Secretary, ABAM (Mumbai), Mr. Lipokwati Lemtur, Mumbai, Rev. L. Yapang Mollier, Secretary, Church & Mission, ABAM aser Rev. Dr. Wati Aier nunger liasü.

Iba sentong ya tanü alima nung joko alu menzüka yur aritepa nübo ayongdena inyaksü mapang, ta meteta kibong rangpeni shilem agia wadang tuluji takok nung inyaksü nükla nung iba sentong

ajiogo. jembirtem; Tetsü ka Ayak, Tenzüker Kibong nung Tebu ka Ayak, Tenyaba mapa nung Kibong Rangpen aser Tsüingrem Tenzükerji Alima Nükrangtong. Tsüingremi Ao Baptist Arogotem aser Fellowship nung inyaktertem ajak wadang tuluba inyaka aotsü asoshi moajangma.

jembirtem; Tetsü ka Ayak, Tenzüker Kibong nung Tebu ka Ayak, Tenyaba mapa nung Kibong Rangpen aser Tsüingrem Tenzükerji Alima Nükrangtong. Tsüingremi Ao Baptist Arogotem aser Fellowship nung inyaktertem ajak wadang tuluba inyaka aotsü asoshi moajangma.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

So

(n) chi chiyongba oset (plate)

* Tanü benjong nung merang so nung chiyongdaksü.

Sobaliba

(n) tasonü nungi tasünü tashi takümlibaren (culture, tradition)

* Asenok sobaliba nung kasa kidong kibamelembur.

OLONG PAITEP # 6700

Grid for OLONG PAITEP # 6700 with numbers 1-15 in various cells.

TIPIEN

- 1. Tiyong nung (9)
4. Tenüng atet (3)
5. Chi bendendak (5)
7. Kiyimla (9)
10. Ki anasa (9)
12. Tiyazü (5)
14. Ali nung tsük (3)
15. Tatok magütsüi meyipa inyaksü merang (9)

LANGTSÜNGLEN

- 1. Tenarong majung (5)
2. Teküp sulen aliba (3)
3. Saklok (5)
6. _____ hi (4)
8. Ne sasa (3)
9. Tanur masü (4)
10. Ki temalen (5)
11. lbaji _____ (6)
13. _____ in (3)

OLONG PAITEP # 6699 TELANGZÜBA

TIPIEN:

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN:

- 1. Aruli, 3. Balala, 5. Suwar, 6. Belem, 9. Sujuk, 10. Aonung, 11. Dokan, 13. Tinu.



ALOKBA BILEMBA SHIDAK ATALOK

Pastor : Hello... Alokba! Na kidang lir südi... Ni Ken arurako...
Alokba : Hello... Kwa koda! Tanepbo tayoker O talir na ajurutep amai ah yah! Ni tanü nenok office mapang Ken arutsü nu dangi ashitsü tayazükerba nai phone asuato ya! Koda?
Pastor : esssshhh.... Yimyim nung ya naisa yokerah amai bilembe agi, medemerteri letter box nung tang inoktsütsüar yamaibo mezüludaktsünur ta ashiba agi ni nu dangi tonga aruako ya.
Alokba : hahahaha...??... Ya nenoki angaloker.... Hello..... Na apusogo nah?. Ni ang arudi.
Pastor : Ano ana tejembidak nung shir den jembir....
Alokba : Media! Tangbo nenok den ya media pur anir arua jembinung dang tajungba asütsü. Arogo ya Tenzüker kari pei Arogo ama bilemdang nubur temulungjang yirudaktsür. Ajakbo masü ako, na kula ajaki meteta lir, nisung tajung, tajunga mali, tamajunga mali, Aji agi tanepah medemerteri oang asuba agi aruah toh ya! Anepongi kiyongeribo na ya sarasadem aruah ta bilemstsü. Saka nabo tenya ashi angar, ayaah ah! arurji sarasadem kabosa agütsür oangma.
Sarasadem masü dang nur medemer dang ashitsü tajungshi o kar shidi. Jungjunga angar tanep kü dang ashiba amai kata mezüdoki nenok sarasadem agidang shiang noh.
1. Arogo ya sannüker indang masü. Khristar Arogo. Santemji dang nu meyong. Santem junga anepaluang ta shiang. Santem samaba bo odang yutsür, Arogo teinyaktsü ajak nung kibur küma inyaksü temerang ta shiang.
2. Arogo nung tenzüksü shimtetba purtem nai mesaklokba tenzüker tem ajungbena anentsüba tatok meshiang ta shiang. Küm tatakzük yuja lir, anenra ajak anentsütsüla, saka karbo shimshir, (continue) karbo anentsü, koba reason agi? Nu jakyim shimtsü mechi tangar temulung shiranga anentsübaji nai agimadima? Repranga liang, nenok pastor tem ah küm tatakzük yutsütsü, nüngdakra shimshitsü, menungdakra, tang tenzüker nenoki ajungbena anentsüba ama ya, sannüker tem ah anendaktsütsü public dak tashi lir, aji ah temulungjang nung yuang ta shiang.
3. Pastortem aika nübör temulungjang yirudaktsüba agi, tashidak tulu bener timatempa ngur ako, kanga sarasadema Arogo anitsü Tsüngrem dang tauchi meshia ochi nung tenzükang ta shiangma. Tanübo ku dak alema tangar shiba ali, ta bilema sadem-sadema inyaksü akok, saka asüng mera aodang, aji na aser nur kibongi magima ah lir, ta kanga junga shiangma noh...
Pastor : Aei! Alokba! Ni atemaka sarasademjang noh. Ajak atema temelenshitsü ashi nung karibo pei dak angaloker, amajok nung ni mapang indoka ano O meshilen senzüdaktsür ah ya! imliblema tangar dangbo teshima noh! Ni aruba ya.
Alokba : Hainih... Ni recording asüba ya dang angadaktsütsüar.
Pastor : Oh Alokba!

~ Lilir : WhatsApp

Mezüngbuba ZPM election nung Lalliansawta president shim



Aizawl, February 16, 2024

(Agencies): Zoram People's Movement (ZPM) nung president inyaksü atema Lalliansawta shimogo. Mizoram nung 2017 küm ZPM tenteter tang mezüng atema ketdangpurtem shimogo.

Arishi küm 80 tain lenniri September 2017 nungi president mapa inyaka aru. February 16m 2024 nü ZPM-i Aizawl nung mezüngbuba general assembly ayonga agi aser idangji ketdangpurtem shimba mezüngbuba election agia liasü.

ZPM general assembly nung Mizoram kübok tesem balala nungi züngsem 4500 shi adenshi.

Election nung vice president

inyaksü atema Tuichang assembly constituency MLA W Chhuanawma aser treasurer inyaksü atema Aizawl South-II MLA Lalchhuanthanga na shim.

ZPM lennir aser chief minister Lalduhoma-i mungdang nung jembidang party züngsem ajak dang ketdangpur tasentem agizüksü kechiyong parnok ya Tsüngremi party len anitsü atema shimba lir ta ashi.

ZPM ya 2017 küm political party tilala adenshir tentetba lir aser iba nung Lalduhoma-i aniba Zoram Nationalist Party (ZNP) densema lir.

2018 assembly election nung ZPM-i menden 35 nung

toktep aser menden 8 nung takok angu. Iba election nung Lalduhoma-i menden 2-Serchhip aser Aizawl West-I nung takok nguteta liasü.

Iba sülen by-elections agidang ZPM-i Mizo National Front (MNF) tsüngdang Aizawl West-I aser Tuirial mententem nung tamakok angu.

ZPM ya single political party ka aküm aser July 2019 nung Election Commission nungi party registration angu.

November 2023 assembly election nung parnoki menden 40 nung toktep aser idak nungjagi menden 27 nung takok ngua taoba Mizoram CM Zoramthanga-i aniba MNF sorkar atsüngdok.

Assam kübok Bihpuria nung taila hon shibelener 3 apu

North Lakhimpur, February 16, 2024 (Agencies): Lakhimpur district nung police-i nisung asem ket nung taila gold bars bena aliba atema apu.

Par asem ya night service bus ka nung North Lakhimpur nungi Guwahati-i aodang Bihpuria nung apu.

Par asem ya Gulzar Hussain, Abdul Alam aser Tayebur Ali

nunger ta jangiaogo. Abdul Tayapur na ya Bangalmora region kübok Sonapur nung alir aser iba tesem ya taila hon aser sen amshiba atema tetshir.

Bangalmora nung Babul Hussain aser Safiqul Hussain na ket nung taila gold bars 11 apuba sülen anogo ana lir par asem apu.

Lakhimpur kübok Bangalmora region nung taila

hon shishilembaba maparen khen anena aliba sülen ano tenzükogo.

2023 küm Assam police ketdangsür Junmoni Rabha asüba aser Lakhimpur SP o Adl SP na mapa nungi belenba sülen Lakhimpur kübok Bangalmora nung police-i maparen kanga inyakba ajanga taila hon aser sen shibelenba anena liasü.

Meghalaya sorkari Dhaka nung U Tirot Sing Syiem kürakyanglu saya



Shillong, February 16, 2024

(Agencies): Bangladesh kübok Dhaka nung February 16, 2024 nü U Tirot Sing Memorial ka sayaogo. Khasi Hills nung tasütait nisung aser Meghalaya freedom fighter U Tirot Sing Syiem indang kürakyanglu ka saya.

U Tirot Sing Syiem-i par nübortem aser par lima kümzük


aser iba ajanga northeast ung dang masü saka linük nung freedom fighters tasütaittem rongnung ka liasü.

Meghalaya nungi freedom fighters rongnung U Tirot Sing Syiem ya ka lir. Nisung anaji Jaintia Hills nungi U Kiang Nongbah aser Garo Hills nungi Pa Togan Sangma na liasü. Parnoki British yimsüsüba

anema rara aser Jaiñtia freedom fighter U Kiang Nongbah-i British anema noktak aser December 30, 1862 nü pa yimjak nung süngzü agi alenset.

U Tirot Sing Syiem indang kürakyanglu ajanga Meghalaya nungi freedom fighters nem akhümtsübu aser tetushi agütsüba kuli sayur.

Russian opposition lenir Alexie Navalny Arctic Prison nung süogo



Alexie Navalny

Moscow, Tsüklai/February 16 (Agencies): Russian opposition lenir Alexie Navalny Hokulbarnü Arctic prison colony nung süogo, ta Russia indang federal penitentiary service ajanga sangdong ka nung ashi.

Küm 19 atema tepuokdak yua alisang Navalny ya Russia Tir Vladimir Putin anemer tejangja nübu ka liasü.

"Navalny jaja senzüba sülen temang mejungi akum aser idangjisang nisung memeteti akum. Medical staff kera aru aser ambulance team ka jaok. Pa shia arudaktsüsü meranga mera balala agi saka takok mongutet. Paramedics temi pa asüba jangjatsüogo," ta Yamalo-Nenets Autonomous District

nung aliba Federal Penitentiary Service ajanga ashi.

Ajisiüka pa kechi ajanga asü, ajibo ano tejangja memetet.

Navalny indang press secretary-ibo pa asüba osang parnok nem ano magütsü ta ashi.

"Alexie indang okatsür tang Kharp-i otar, kong pa indang prison colony ya lir," ta Kira Yarmysh-i social media post ka nung ashi.

Navalny asüba indang osang Putin nema metetdaksüogo, ta Russia tir indang otongtari ashi.

Russia nung ochimashi mapa jenti inyakba aitsüba sülen Russia nung opposition lenir tejangjatiba sülen anidaker jenti akum. Pa ya 2020 küm Serbia nung Novichok miim mozü agütsüba sülen tera agi masü Germany nung taneptsü ngur 2021 küm tetenzüklen Russia-i meyipa arudang apu aser tepuokdaka yoka liasü.

Arishi küm 47 tain lenir ya küm 19 atema tepuokdaka yok aser pa aitsüba nung rights groups aikati temulung malemer aser antiölen linük temibo pai Kremlin anemba mechi merenshir ta shia liasü. Navalny

ya December ita Arctic Circle temalen aliba "special regime" penal colony-i anir oa liasü.

Moscow northeast tsütsü kilometre 1,900 shi pilar Yamalo-Nenets region kübok Kharp jila nung aliba colony kati pa anir aoba ya pa bhukumer temi aitsü aser Navalny ola madokdaksütsü merangba rongnung iba ya ka lir ta shia liasü.

Meta tezülen aliba region nungya asükwa kanga talang aser tesashi lir. Navalny ajungbena asüba osang angashia United States, United Kingdom aser Germany densema antiölen linüktemi Putin kanga sashia aitsür.

Russian opposition lenir asüba ya tejangja asünungbo, lendong tamajung ka asütsü, ta White House ajanga ashi.

British Ato Kilonser Rishi Sunak-ia Navalny asüba osang ya kangasa majung lir aser Russia nübur asoshi takoksa tulu, ta ashi.

Germany indang Chancellor Olaf Scholz-i Navalny asüba aitsü aser Russian opposition lenir tasü aitiba atema pa takum agiogo ta shia liasü.

SÜR KÜM KA AJUNGBA BILEMTETBA ANOGO Tsürabur Asür S. Tsükjem Lemtur (Kangtsüng)



ANOGO : 17/02/2023

Na iba lima toktsür küm ka süitema aruaka nü temeim aser mapa tajung onoki teti bilemteter. Na onok den taküm meliaka nü shisatsü tajung aser temeim onok den teti lir, na teti asoshi anisüngzükdak Kibuba den Kodak nung lir ta onok tamang sarasadem aser teimla.

~ Chirnur, Anük oko aser Semchirtem.

TSEMINYU TOWN AO BAPTIST AROGO METONGSHITSÜR

Tseminyu Town Ao Baptist Arogo Golden jubilee asoshi tenla agütsürtem tenung February 16, 2024 anogo adok osangkakettem nung adoktsübatem rongnung yamai metongshia agidaktsüner :

- 1) SL No 28. Dr. (Mrs) Shisarenla Aier & Er.Mangyanger Jamir, - Rs.30,000 KVK Kohima (Unger)
 - 2) SL No.180.Mr & Mrs.Phamü Semy, Tseminyu Town - Rs.1,000
 - 3) SL No.99. Aoyim Baptist Arogo Dimapur - Rs.10,000
- Aser ano item ya enoksema agidaktsüner :
- 1) Mr & Mrs. Imtinuksung SMS, KVK. Kohima - Rs.10,000
 - 5) Molungkimong Ao Baptist Arogo - Rs.5,000

Sd/- Sd/-
I. Anung Lemtur. Sunep Pongen
Pastor. Convenor, Jubilee Planning Committee.

Bajwa aser Faiz nungeri Imran Khan sorkar laodaktsü: Fazlur Rehman

Islamabad, Tsüklai/February 16 (Agencies): Pakistan nung Islamic party tejangja ka indang lenir kati, Imran Khan sorkar ya mitkar leniri laodaktsü, ta ashi aser kasahi Pakistan Tehreek-e-Insaf (PTI) leniria jembia arur.

2022 küm April ita Pakistan ato kilonser inyaka alisang Khan ya no-confidence vote ka nung tamakok ajurua yimsüsüba menden nungi atsiungdoka liasü. Opposition party temi pa anema motion benoka vote agitepa liasü. Ajisiüka yimsüsüba menden nungi Khan atsiungdoka ya US-i anir tasa tamajung amshiba nung shilem ka lir ta PTI-i maneni temulung melemtet tai tonglokja aru.

Brehostibarnü Samaa TV talk show mapang Jamiat Ulema-e-Islam-Fazl (JUI-F) tekolakba Maulana Fazlur Rehman-i ashiba agi, taoba army chief Gen (rtd) Qamar Javed Bajwa-i Pakistan Tehreek-e-Insaf sorkar laodaktsü. Imran Khan anema

tentetba Pakistan Democratic Movement (PDM) coalition tekolakba shimsang Rehman-i ashiba agi, "PPP-i PTI anema no-confidence motion benoka liasü. No-confidence motion mapang Gen Bajwa aser Faiz Hameed (taoba Pakistan spy chief) nungeri onok den osangtsüsang agitepa liasü."

"Gen Bajwa, Faiz Hameed nati party ajunga dang no-confidence motion atema vote agitsü shia liasü," ta Fazlur Rehman-i ashi.

"Sorkar anema nisung kar nokdaktsüla, kechiaser parnoki tai inyaker. Tangatettep kati maru tashi longkak aitiba manentsü, kechiaser establishment ya politics nung inyaktsü kecha mali. Iba longkak aitiba mechi revolution ka alitsü," ta Rehman-i ashi.

"State institutions ya akaji akumtsübor, saka kechiba politics nung tetsüing ajemoker? Election ochishia agiogo ta establishment-i bilemra, May 9 nü rongrong

adokba ya mejembitsüla," ta Rehman-i ashi.

PTI den jembishinüba indang jembidang Rehman-i ashiba agi, "PTI den tangatetba balala lir aser aji angatetteptsü."

Nawaz Sharif'er PML-N ajanga Pakistan Peoples Party densema danga party tem teyari nung coalition sorkar ka kumtetsü sentong aliba sangdongba atema pai aitsü.

"Tang aliba parliament nung tarutsü nükla mali, kechiaser parliament nung telemtetba aser policy tem ya dangalen nungi arutsü," ta pai ashi.

Rehman ya ya akhi mapang nungi establishment (mitkar) den tesendaktep tajung lia aru, saka elections nung tamakok tulu ajurba sülen tesendaktep raksa. Saka Rehman ya yimten yimsüsür tejen asünung mitkar anema jembia pa tarutsü nung sorkar nung shilem agitsü bushir alitsü südi ta pa anemer temi ashir.

(Maneni tapak 8 nung...)

Kim Jong Un-i achayanga missile tasen ka tendang

Pyongyang, Tsüklai/February 16 (Agencies): North Korea lenir Kim Jong Un-i achayanga surface-to-sea missiles tasen ka tendang aser par mitkar dang South Korea arütsü nung Yeonpyeong asetkong north tsütsü mangatettep aliba tzüyim nung tashi itshitsü renema alitsü totuyuba agütsü.

Missile tendangba osang ya Korean Central News Agency (KCNA) ajanga Brehostibarnü sangdong aser North Korea-i cruise missiles kar anüdoklen Wonsan rongnendak anasa

tzüyim nung khaloktsü ta Bodhbarnü South Korea indang mitkari shia liasü. Iba ya Pyongyang-i taküm missile trok buba tendangba alitsü.

Navy anshitsüba new-type surface-to-sea missile Padasuri-6 tendangba ya Kim-i achayanga liasü aser pai temulung süa bilemba lemsatet, ta KCNA ajanga ashi.

Missile tem ya seconds 1,400 shi East Sea anüngen yima orr target nung kongshi, ta ashi. East Sea dang ya Sea of Japan ta ajar.

South Korea-i teti ozü linük temeden nung aibelena Korea ana tsüngta "Northern Limit Line" (NLL) nung kongshir aser maritime patrols yoka danga linüktem indang rong senzüdaktsür ta Kim-i aitsü, ta KCNA ajanga ashi.

North Korea leniri par mitkartem dang NLL region kübok Yeonpyeong Island north tsütsü aser Korean peninsula antiölen tsütsü raratsü renema alitsü aser tashi itshitsü totuyuba agütsü.

(Maneni tapak 8 nung...)

Israel-i Gaza nung mozüki tulutiba meita ao

Jerusalem, Tsüklai/February 16 (Agencies): Israel sepaitemi Brehostibarnü Gaza nung tang tashi meshibangi aliba mozüki tulutiba meita ao aser iba inyakyim indang video prokshiba nung nisung nongzütepa, asatepa aser prangbong ola angashia liasü.

Nasser Hospital nungya Hamas telungpur atsüka lir aser pua alirtem yua lir ta osang angazükba nung ajemdaker iba mozüki meita ao ta Israel mitkari ashir, koba Hamas-i tiaziü ta ashir.

Ajisiüka Gaza nung aliba health ministry ajanga ashiba agi, mozüki meita aoba sülen shirangertem aser ketdangsurtem tetsübo tia nung lir, kechiaser tesem balala nungi civilian meyirijang aika yangji jenoka aliba Israel sepaitemi meindok.

Nisung 460 dak tema mozüki tejenbai yok, kong chiyongtsü mali, tanur atema mamatzü mali aser tzü agi kanga anünga lir ta ministry ajanga ashi.

"Medical resources peria maliba ajanga Nasser medical complex nung tensa kanga mejungi lir," ta ashi.

Israel nung sniper temi nisung kar kaset, tank temi injang khaloktsü aser prangbong tuloktsür nisungtem meindok, ta hopta tetenzüklen iba mozüki nung inyaker nurse kati osangbener dang shia liasü.

Brehostibarnep mozüki nung injang bomb khaloktsüba

sülen tensa kanga mejungi kumogo, kong nisung kar asü aser kar yiru, ta medical charity Doctors Without Borders ajanga ashi.

"Ozü medical staff tem shirangertem yutsür mozüki nungi jena aotsüsa akum," ta MSF ajanga X nung ashi.

Social media nung video prokshiba nung rescuer temi shirangertem mozüki indang orthopaedic ward nungi anir aotsü meranga liasü.

Mobile flashlights amshia tekumzüker temi shiranger ka yipten nung mejanger atsür oa liasü aser dangar temi shiranger ka blanket nung aleper ajunger ao.

Ano Gaza nung health ministry ajanga video ka yokba nunga corridor sünga shirangertem yipten nung mejanga aliba angu.

Gaza Strip nung aliba Israel sepaitemi tanen makai mozüki tem meita aor aser itemji Hamas teloki command centres ama amshir ta tai tongloktsür.

Video ka nung prangbong ola angashi aser doctor kati, "Nisung kar danga telung nung ali asü? Injang khaloktsür, injang khaloktsür, tekolak alileni loang," ta ayimtena liasü.

Ano video ka nung nisung kati ashiba agi, Israel army temi mozüki lungbanga lir aser shinga iba tesem yutsür moteter.

Gaza nung ajunga atema Nasser hospital ya kanga tongtipang lir ta WHO ajanga ashir, kong mozüki tila kar ang anünga lir.

NO&PG 2024: Wushu nung Zunheboto district-i overall champions aben



Wushu tetoktepba nung medal angurtem den NWA ketdangsürtem aser tongtipang nisungtem Hokulbarnü Arena E nung tangokba noksa ka yangi angur.

Kohima, Tsüklai/February 16 (TYO): 3rd Nagaland Olympics & Paralympic Games 2024 nung shilem ka ama Hokulbarnü Arena E, Chümoukedima nung Wushu competition aliba nung Zunheboto district-i overall champions benogo.

Iba tetoktepba nung Zunheboto-i gold asem, silver pezü aser bronze ana, ajak agi medals toku angu aser iba sülen tanabuba jenjang nung Dimapur-i medal trok (gold asem, silver ka aser bronze ana) ngua liasü.

Best fighter sempet ya Mon district nung Mankho T. Konyak nem agütsü aser Peren district ya Best disciplined team shima liasü.

Ananü Wushi competition ya tang telidak 3rd Nagaland Olympic and Paralympic Games nung shilem ka lir, koba

Nagaland Wushu Association ajanga ayongzuka liasü.

Iba tetoktepba nung Dimapur, Peren, Phek, Mon, Shamator, Mokochung aser Zunheboto district tem nungi tetsür tenet densema parnok asayar 52-i shilem agia liasü.

Iba asaya tembangba sentong nung Advisor, CAWD & Taxes, Kudecho Khamo aser NWA tir dena liasü.

Advisor Khamo-i iba sentong nung jembidang lanur ajunga dang saisapong ya profession ka ama züngshitsü ajungshi aser tang sports industry nung teimla tulu lir ta ashi.

Saisapong ajanga asayarji alima dang state indang ambassador ka ama kumtetsü, ta pai ashi aser NOA tir aser CM Neiphu Rio lenisüba kübok state nung sports facilities aser sapang tajungba kumogo ta

ashi. NWA tir-ia facilities aser senotsü peria meliaka state nung Wushu player anitetsü nükjidong nung association-i bendanga agütsür inyaker ta ashi.

Advisor to CM, IDAN chairman aser NOA secretary general, Abu Metha-ia iba sentong nung jembidang NWA-i iba sentong takok ngua ayongzuktetba atema tenüngsang agütsü aser NOA atema Wushu ya tongshi tashi tait ka lir ta ashi.

Nagaland Olympic Games nung Wushu ya jangratemtsü aketba asaya ka liasü aser asayar tajungtibatem ita ka tsüngta Northeast Olympic Games nung state tenüng nung shilem agitsü, ta pai ashi.

Iba sentong nung Wushu Association of India nungia terepranger arua liasü.

FIFA Ranking nung India jenjang 117-i aluogo

Tsüklai/February 16 (Agencies): AFC Asian Cup nung tamakok ajuruba sülen tang tesüsa sangdongba FIFA rankings nung India nung tebur national football team ya jenjang 117 bubai aluogo.

India ya jenjang 102 nung liasü saka Brehostibarnü sangdongba FIFA men's world ranking nung India nung tebur national football team ya spot 15 alemer alua liasü. Taoba ita Doha nung AFC Asian Cup asayamung nung India ya round mezüngbuba nung tsüka liasü.

CAF African Cup of Nations aser AFC Asian Cup sülen temelenshi aika lir. African tsütsü Ivory Coast ya spot ter alemer jenjang 39 bubai nung lir, shirnoki CAF African Cup of Nations asayamung takok ngua liasü.

AFCON runners-up Nigeria ya jenjang 14 alemer tang jenjang 28 nung mena lir, saka Angola ama linük kata mali, shirnok AFCON last eight nung Nigeria-i tsükdakjaka jenjang timba meraloka atoba linük lir. Anaben Asian Cup akoker Qatar ya

jenjang 37 bubai nung lir. Asian Cup final nung tsüker Jordan ya jenjang 70 nung lir, Thailand ya 101 nung lir, shirnok Asian Cup last-16 stage tashi asaya liasü.

AFCON akoker Ivory Coast-i round of 16 nung tsükdaktsür Senegal ya jenjang 17 nung lir aser Tajikistan ya jenjang 99 nung lir aser ibaji par asoshi top 100 nung tang mezüng alitsü.

FIFA ranking top ten nung alirtembo temelenshi kecha mali kasa jenjang nung lir.



Hokulbarnü Pencak Silat asaya nung takok angurtem den Advisor, Youth Resources & Sports, Keoshu Yimchunger aser dangartem Immanuel Hall, Y Zhimo Colony, Dimapur nung tangokba noksa ka yangi angur.

KHRISTAN OSANG : Tapak 5 nungi...

Yaküm Nigeria nung kiralongrartemi Khristan...

"Tesüiba küm ishika tsüngda alima nung asalentong yanglur nisung teimtiba tepsetba linüktem rongnung Nigeria ya jenjang tanabuba kümogo. 2009 küm nungi tenzüka yimsü nung ajemdaker Nigeria nung nisung 150,000 dak tema tepsetogo," ta report nung shia lir.

"Civilian 150,000 tepsetba nungjagi 100,000 shi Khristantem lir, Muslim nung 46,000 shi lir aser tanga yimsü amangertem 4,000 shi lir. Nigeria nung asüba dang nungi teimtiba asüba linükji Syria lir. 2011 küm nungi tenzüka civil war ajanga Syria nung civilian 306,000 shi süogo," ta report nung shia lir.

Nigeria nung Khristantem tepsetba ya asalentong yanglur tepsetba lir; osangbenertemi item osang mesangdonger aser alima linüktemi ibajia anema ola madoker, ta International Society for Civil Liberties and Rule of Law (Intersociety) report ajangasa metetdaksü.

Nigeria nung civilian ki meyrjang aika rongdoktsüogo, Khristantem tekülem ki 18,500 shi raksatsüogo aser Christian/Traditional education centres 2,500 shi raksatsüogo. Kasa mapang nungji Khristantem aser Muslim nung masüba nisungtem meyong ali 59,000 square kilometer rakzükogo, ta parnokisa metetdaksü.

BENDANGLI OSANG : Tapak 7 nungi...

Bajwa aser Faiz nungeri Imran Khan sorkar...

Ajisüaka taoba mapang army chief inyaka alisang General (rtd) Qamar Javed Bajwa-i iba mapang aliba opposition dang taoba ato kilonser Imran Khan anema benoka aliba vote of no-confidence (VONC) agientsü ashi, ta PML-N lenir Malik Ahmad Khan-i Hokulbarnü ashi.

April 2022 nung Imran Khan atsüngdokba no-trust motion ya Gen Bajwa aser Peshawar corps commander inyaka alisang ex-spymaster Lt Gen Faiz Hameed nati inyak ta Jamiat Ulema-i-Islam-Fazl (JUI-F) tetsüti Maulana Fazlur Rehman-i ashiba sülen Malik Ahmad Khan-i iba sangdong ya agütsü.

Lahore nung osangbener senden ka nung jembidang Ahmad-i ashiba agi, "Iba senden nungya political party ajunga nungi lenirtem liasü, aser Gen Bajwa-i VONC

benoktsü ashi ta Fazl-i ashir süra, ni iba tatalokba indang yamai jangjatsür, Bajwa-iang VONC bener marutsü ashi."

"Bajwa ya Imran indang representative liasü, aser iba atema ni tai apu aser army tekolakba kechi asü ta ni asügang," ta pai ashi.

Iba senden ya March 26, 2022 nü Punjab House anasa B-Mess nung amen, ta Ahmad-i ashi.

Imran Khan idangji menden nungi alur election agi asütsü asünungbo VONC atema jembitsü kecha mali ta ozüng party tangatetba liasü, ta ashi.

Iba senden nung Fazl-iang kechiba iba senden ayongzuka yur nai yamai ashir ta asügang, ta PML-N leniri ashi.

Iba senden nung Gen Faiz meliasü, kechiaser pa iba mapang dangalen corps commander ama inyaka liasü, ta pai ashi.

Kim Jong Un-i achayanga missile tasen...

NLL anasa aliba tzüyim ya United States-i aniba United Nations Command ajanga 1953 küm Korean War tatemi asüdangtsü aser taoba mapang yangji Korea linük ana tsüngta raratepa liasü. 2010 küm Yellow Sea nung North Korea-i South Korean warship ka poksaja rong anir nisung 46 tepset aser Yeonpyeong Island nung artillery shells khalokja nisung pezü tepset.

"North Korea anüolen tzüyim nung line kwika lider liaka, asenoki asen indang maritime border lines ta züngshiba nung tsükchir temi aibelenra asenoki aji asen temeden anema inyakba aser rara mesüba ama züngshitsü,

ta Kim-i ashi. Pyongyang-i tzüyim nung asen temeden nok-nü aser mapa agi wazüka ayutsü, ta pai ashi.

South Korea-i asen ali, anüng aser tzüyim millimetre 0.001 danga agira, ibaji rara mesüba ama züngshitsü, ta Kim-i küm tetenzüklen parliament nung shia liasü.

Kim-isa munitions factory tuluka semdang aser yangji injang-bomb yangluba tejanga angazuka liasü, ta KCNA ajanga ashi.

Pai factory nung inyakertem dang injang-bomb tajungba aser tekeraba nung yanglutsü mapa nungloksü, ta ashi.

BILEMDANGANG "Takok angunübo shiranga memeteter."